

四庫全書

子部

欽定四庫全書

子部

太平廣記卷

二百至
二百四

詳校官中書臣潘有為

侍讀臣孫球覆勘

總校官進士臣楊懋珩

校對官中書臣鮑之鍾

謄錄監生臣袁繼升

欽定四庫全書

太平廣記卷二百

文章

李蔚

盧渥

韓定辭

姚巖傑

狄歸昌

杜荀鶴

武臣有文

曹景宗

高昂

賀若弼

李密

高崇文

王智興

高駢

羅紹威

趙廷壽

文章

李蔚

唐丞相李蔚鎮淮南日有布素之交孫處士不遠千里徑來修謁蔚浹月留連一日告發李數舊分遊河祖送過於橋下波瀾迅激舟子迴趺舉篙濺水近坐飲妓濕衣尤甚李大怒令擒舟子荷於所司處士拱而前曰因茲寵餞是某之過敢請筆硯略抒荒蕪李從之乃以柳枝詞曰半額微

黃金縷衣玉搔頭，
晨鳳雙飛從敎水。
濺羅裙濕還道朝來行，
雨歸李覽之釋然歡笑賓。
從皆贊之命伶人，
唱其詞樂飲至暮。
舟子赦罪更有李嶸獻詩云：
雞樹烟含瑞氣凝，
鳳池波待玉山澄。
國人久倚東關望，
擬築沙堤到廣陵。
後果入相。

出打情詩

盧渥

唐左丞相盧渥，
軒冕之盛近代無比。
伯仲四人咸居顯列，
乾符初母憂服闋，
渥自前中書舍人拜陝府觀察使。
又旬日其弟紹自前長安令除給事中，
又旬日弟沆自

前集賢按理除左拾遺又旬日弟沼自畿尉遷監察御史詔書疊至士族榮之及赴任陝郊洛城自居守分司朝臣已下互設祖筵遮於行路洛城為之一空都人觀者架肩擊轂盛於清明灑掃之日自臨都驛以至於行此五十里連翩不絕有白鬚傳卒鳴指歎曰老人為驛吏垂五十年閱事多矣而未曾見祖送之盛有如此者時士流竊語以此日在家者為耻渥有題嘉祥驛詩曰交親榮餞洛城空善戲戎裝上將同星使自天丹詔下

雕鞍照地數程中
馬嘶靜谷聲偏響
旆映晴山色更紅
到後定知人易化
滿街棠樹有遺風
詩版後為易定帥

王存尚書碎之

出唐
關史

韓定辭

唐韓定辭為鎮州王鎔書記聘燕帥劉仁恭舍於賓館
命試幕客馬或延接馬有詩贈韓曰燧林芳草綿綿思
盡日相攜陟麗譙別後巖嵒山上望羨君時復見王喬
或詩雖清秀然意在徵其學問韓亦於座上酬之曰崇

霞臺上神仙客學辨癡龍藝最多盛德好將銀管述麗
詞堪與雪兒歌座內諸賓靡不欽訝稱妙句然亦疑其
銀筆之僻也他日或復持燕帥之命答聘常山亦命定
辭接於公館時有妓轉轉者韓之所眷也每當酒席或
頻目之韓曰昔聞晉文公分季隗於趙衰孫伯符輟小
喬於公瑾蓋以色可奉名人但慮倡姬不如賢者之顧
願垂一詠俾得奉之或援筆文不停綴作轉轉之賦其
文甚美咸欽其敏妙遂傳於遠近或從容問韓以雪兒

銀管之事韓曰昔梁元帝為湘東王時好學著書常記錄忠臣義士及文章之美者筆有三品或以金銀雕飾或用斑竹為管忠孝全者用金管書之德行清粹者用銀管書之文章瞻麗者以斑管書之故湘東之譽振於江表雪兒者李密之愛姬能歌舞每見賓僚文章有竒麗入意者即付雪兒叶音律以歌之又問癡龍出自何處定辭曰洛下有洞穴曾有人誤墮於穴中因行數里漸見明曠見有宮殿人物凡九處又見有大羊羊髯有

珠人取而食之不知何所後出以問張華曰此地仙九
館也大羊者名曰癡龍耳定辭復問或巘嵒之山當在
何處或曰此隋君之故事何謙光而下問由是兩相悅
服結交而去

出北夢
瑣言

姚巖傑

姚巖傑梁公元崇之裔孫也童丕聰悟絕倫弱冠博通
墳典慕班固司馬遷為文時稱大儒常以詩酒放逸江
左尤肆凌忽前達旁若無人唐乾符中顏標典鄱陽郡

鞠場公宇初構請巖傑紀其事文成燦然千餘言標欲
刊去一兩字巖傑大怒標不能容時已勒石遂命覆碑
於地磨去其文巖傑以一篇紀之曰為報顏公識我麼
我心唯祇與天和眼前俗物關情少醉後青山入夢多
田子莫嫌彈鋏恨甯生休唱飯牛歌聖朝若為蒼生計
也合公車到薜蘿盧肇牧歙州巖傑在婺源先以著述
寄肇肇知其使酒以手書褒美贈以束帛辭云兵火之
後郡中凋弊無以迎逢大賢巖傑復以長牋激之肇不

得已迂至郡齋待如公御禮既而日肆傲睨輕視於肇
肇常以篇詠誇於巖傑曰明月照巴天巖傑大笑曰明
月照一天奈何獨言巴天耶肇漸不得意無何會於江
亭時蒯希逸在席盧請目前取一事為酒令尾有樂器
之名肇令曰遠望漁舟不濶尺八巖傑遽飲酒一器凭
欄嘔噦須臾即席還令曰凭欄一吐已覺空喉其侮慢
倨傲如此

出擬
言

狄歸昌

唐僖宗幸蜀有詞人於馬嵬驛題詩云馬嵬煙柳正依
依重見鑾輿幸蜀歸泉下阿蠻應有語這迴休更泥楊
妃不出名氏人仰竒才

此即侍郎狄歸昌
詩也 出抒情詩

杜荀鶴

唐杜荀鶴嘗吟一聯詩云舊衣灰絮絮新酒竹筍筍或話於韋
莊莊曰我道印將金鑲鑲簾用玉鈎鈎莊後西蜀為相

出北夢
瑣言

武臣有文

曹景宗

梁曹景宗累立軍功天監初徵為右衛將軍後破魏軍
振旅帝於華光殿宴飲聯句左僕射沈約賦韻景宗不
得韻意色不平啓求賦詩帝曰卿伎能甚多人才英拔
何必止在一詩景宗已醉求作不已詔令賦競病兩字
景宗便操筆而成曰去時兒女悲歸來笳鼓競借問行
路人何如霍去病帝欣賞不已於是進爵為公

出曹景宗傳

高昂

北齊高昂字敖曹膽力過人姿彩殊異其父次同為求

嚴師教之昂不遵師訓專事馳騁每言男兒當橫行天下自取富貴誰能端坐讀書作老博士也其父以其昂藏敖曹故名字之東魏末齊神武起義昂傾意附之因成霸業除侍中司徒兼西南道大都督而敖曹酷好為詩雅有情致時人稱焉常從軍與相州刺史孫騰作行路難曰卷甲長驅不可息六日六夜三度食初時言作虎牢停更被處置河橋北迴首絕望便蕭條悲來雪涕還自抑又有征行詩曰瓏種千口羊泉連百壺酒朝朝

圍山臘夜夜迎新婦頃之其弟季式為齊州刺史教曹
發驛以勸酒乃贈詩曰憐君憶君停欲死天上人間無
可比走馬海邊射遊鹿偏坐石上彈鳴雉昔時方伯願
三公今日司徒羨刺史餘篇甚多此不復載

出談
數

賀若弼

隋賀若弼字輔伯少有大志驍勇便弓馬解屬文涉書
記有重名及隋文受禪陰有平江南之志訪可任者高
頴薦弼有文武才幹拜總管委以平陳之事若弼欣然

以為已任與壽州總管源雄並為重鎮若弼遺詩曰交
河驃騎幕合浦伏波營勿使麒麟上無我二人名獻平
陳十策稱上旨開皇九年大舉伐陳以若弼為行軍總

管俘陳叔寶

出賀若弼傳

李密

隋李密蒲山公寬之子也初授親衛大都督非其所好
稱疾而歸大業中佐楊玄感起兵及玄感敗密間行入
關亡抵平原賊帥郝孝德不禮之遭饑饉至削樹皮而

食乃詣睢陽舍於村中變名姓稱劉知遠聚徒教授經
數月不得志乃為五言詩曰金風颺秋節玉露凋晚林
此夕窮途士鬱陶傷寸心眺聽良多感慷慨獨霑襟霑
襟何所為悵然懷古意秦俗猶未平漢道將何冀樊噲
市井屠蕭何刀筆吏一朝時運合萬古傳名諡寄言世
上雄虛生真可愧詩成泣下數行義寧元年密潛據洛
口會羣盜百萬築壇稱魏公建元二年密自鞏洛鼓行
伐隋兵敗歸唐授光祿卿

出河
洛記

高崇文

唐相高崇文本薊門之驍將也以討劉闢功授西川節度使一旦大雪諸從事吟賞有詩崇文遽至飲席笑曰諸君自為樂殊不見顧鄙夫鄙夫武人亦有一詠雪詩乃口占曰崇文崇武不崇文提戈出塞舊從軍有似胡兒射飛鴈白毛空裏落紛紛詩多中的皆謂北齊教曹之比太尉駢即其孫也

出北夢瑣言

王智興

唐侍中王智興初為徐州節度使武略英特有命世之譽幕府既開所辟皆是名士一旦從事於使院會飲與賓朋賦詩頃之達於王王乃召護軍俱至從事因屏去翰墨但以盃盤迎接良久問之曰適聞判官與諸賢作詩何得見某而罷遽令却取筆硯以彩牋數幅陳席上衆賓相與遲疑俟行觴舉樂復曰本來欲觀製作非以飲酒為意時小吏亦以牋翰置於王公之前從事禮為揖讓王曰某韜鈴發跡未嘗留心章句今日陪奉英髦

不免亦陳愚懇於是引紙援毫頃刻而就云三十年來
老健兒剛被郎官遣作詩江南花柳從君詠塞北烟塵
我自知四座覽之驚歎無已時文人張祐亦預此筵監
軍謂之曰觀茲盛事豈得無言祐即席為詩以獻云十
年受命鎮方隅孝節忠規兩有餘誰信將壇嘉政外李
陵章句右軍書智興覽之笑曰褒飾之詞可謂過當矣
左右或言曰書生之徒務為諂佞智興叱之曰有人道
我惡汝輩又肯否張秀才海內名士豈云易得天下人

聞且以為王智興樂善矣駐留數旬臨岐贈絹千匹
劇出

談錄

高駢

唐高駢幼好為詩雅有奇藻屬情賦詠橫絕常流時秉
筆者多不及之故李氏之季言勳臣有文者駢其首焉
集遇亂多亡今其存者盛傳於時其自賦言懷詩曰恨
乏平戎策慚登拜將壇手持金鉞重身掛鐵衣寒主聖
匡扶易恩深報効難三邊猶未靜何敢便休官二女廟

詩云帝舜南巡去不還二妃幽怨水雲間當時珠淚垂
多少直到而今竹尚斑又詠雪云六出花飄入戶時坐
看修竹變瓊枝逡巡好上高樓望蓋盡人間惡路岐又
聽歌詩公子邀歡月滿樓佳人揭調唱伊州便從席上
秋風起直到蕭關水盡頭又寄僧筇竹杖詩云堅輕筇
竹杖一杖有九節寄與沃州僧閑步秋山月

出謝蟠
雜說

羅紹威

梁鄴王羅紹威世為武人有膽決喜尚文學雅好儒生

於廳所之側別立學舍招延四方遊士置於其間待以
恩禮每旦視事之暇則與諸儒講論經義聚書萬餘卷
於學舍之側建置書樓縱儒士隨意觀覽已亦孜孜諷
誦當時藩牧之中最獲文章之譽每命幕客作四方書
檄小不稱旨壞裂抵棄自襍牋起草下筆成文雖無藻
麗之風幕客多所不及又僻於七言詩每歌酒讌會池
亭遊覽靡不賦詠題之屋壁時江南有羅隱者為兩浙
錢鏐幕客有文學紹威特遣使幣交聘申南阮之敬隱

悉以所著文章詩賦酬寄紹威紹威大傾慕之乃目已
所為詩曰偷江東今鄴中人士有諷誦者自為大廳記

亦微有可觀

出羅昭威傳

趙延壽

偽遼丞相趙延壽德鈞之子也仕唐為樞密使清泰末
自太原陷虜耶律德光用為偽丞相綜國事晉少主失
政延壽道戎王為亂凡數年之間盜有中夏實延壽贊
成之力也延壽將家子幼習武畧即戎之暇時復以篇

什為意亦甚有雅致嘗在邊庭賦詩曰黃沙風捲半空
拋雲動陰山雪滿郊探水人迴移帳就射鵬箭落着弓
抄鳥逢霜果饑還啄馬渡冰河渴自跑占得高原肥草
地夜深生火折林梢南人聞者往往傳之

出趙延壽傳

太平廣記卷二百

欽定四庫全書

太平廣記卷二百一

才名

上官儀

東方虬

蘇頲

李邕

李華

李白

好尚

房琯

韓愈

李約

陸鴻漸

獨孤及

杜兼

李德裕

潘彥

宋之慈

朱前疑

鮮于叔明

權長孺

才名

上官儀

高宗承貞觀之後天下無事上官儀獨持國政嘗凌晨
入朝巡洛水隄步月徐轡詠詩曰脈脈廣川流驅馬歷
長洲鵲飛山月曙蟬噪野風秋音韻清亮羣公望之若

神仙

出國史
異纂

東方虬

左史東方虬每云二百年後乞與西門豹作對尤工詩
沈佺期以工詩著名燕公張說嘗謂之曰沈三兄詩直
須還他第一

出國史
異纂

蘇頲

蘇頲少聰俊一覽千言景龍二年六月二日初定內難
頲為中書舍人在太極後閣時頲尚年少初當劇任
文詔填委動以萬計時或憂其不濟而頲手操口對無

毫釐差失主書韓禮譚子陽轉書詔草屢謂頰曰乞公
稍遲禮等書不及恐手腕將廢中書令李嶠見之歎曰
舍人思若泉湧嶠等所不及也

出譚
賓錄

李邕

李邕自刺史入計京師邕素負才名頻被貶斥皆以邕
能文養士賈生信陵之流執事忌勝剝落在外人間素
有聲稱後進不識京洛阡陌聚看以為古人或將眉目
有異衣冠望風尋訪門巷又中使臨問索其新文復為

人陰中竟不得進改天寶初為汲郡北海太守性豪侈
不拘細行馳獵縱逸後柳勣下獄吉溫令勣引邕議及
休咎厚相賂遺詞狀連引敕初順之羅希奭馳往就郡
決殺之邕早擅才名尤長碑記前後所製凡數百首受
納饋送亦至鉅萬自古鬻文獲財未有如邕者

出譚
賓錄

李華

李華以文學名重於天寶末至德中自前司封員外起
為相國李梁公峴從事檢校吏部員外時陳少遊鎮維

揚尤仰其名一旦城門吏報華入府少遊大喜簪笏待
之少頃復白云已訪蕭功曹矣功曹穎士也

出撫
言

李白

李太白初自蜀至京師舍於逆旅賀監知章聞其名首
訪之既竒其姿又請所為文白出蜀道難以示之讀未
竟稱歎數四號為謫仙人白酷好酒知章因解金龜換
酒與傾盡醉期不間日由是稱譽光赫賀又見其烏棲
曲歎賞苦吟曰此詩可以泣鬼神矣曲曰姑蘇臺上烏

棲時吳王宮裏醉西施吳歌楚舞歡未畢西山猶銜半
邊日金壺丁丁漏水多起看秋月墮江波東方漸高奈
樂何或言是烏夜啼二篇未知孰是又烏夜啼曰黃雲
城邊烏欲棲歸飛啞啞枝上啼機中織錦秦川女碧紗
如煙隔窻語停梭向人問故夫欲說遼西淚如雨白才
逸氣高與陳拾遺子昂齊名先後合德其論詩云陳已
來豔薄斯極沈休文又尚以聲律將復古道非我而誰
歟玄宗聞之召入翰林以其才藻絕人器識兼茂便以

上位處之故未命以官嘗因宮人行樂謂高力士曰對此良辰美景豈可獨以聲伎為娛儻時得逸才詞人吟詠之可以誇耀於後遂命名白時寧王邀白飲酒已醉既至拜舞頽然上知其薄聲律謂非所長命為宮中行樂五言律詩十首白頓首曰寧王賜臣酒今已醉儻陛下賜臣無畏始可盡臣薄技上曰可即遣二內臣掖扶之命研墨濡筆以授之又命二人張朱絲欄於其前白取筆抒思略不停綴十篇立就更無加點筆跡適利鳳

時龍拏律度對屬無不精絕其首篇曰柳色黃金嫩梨
花白雪香玉樓巢翡翠珠殿宿鴛鴦選妓隨雕輦徵歌
出洞房官中誰第一飛燕在昭陽玄宗恩禮極厚而白
才行不羈放曠坦率乞歸故山玄宗亦以非廊廟器優
詔許之嘗有醉吟詩曰天若不愛酒酒星不在天地若
不愛酒地應無酒泉天地既愛酒愛酒胡愧焉三杯通
大道五斗合自然但得酒中趣勿為醒者傳更憶賀監
知章詩曰欲向東南去定將誰舉杯稽山無賀老却棹

酒船迴後在潯陽復為永王璘延接累謫夜郎時杜甫
贈白詩二十韻多叙其事白後放還遊賞江表山水卒
於宣城之采石葬於謝公青山范傳正為宣歙觀察使
為之立碑以旌其隧初白自幼好酒於兗州習業平居
多飲又於任城縣構酒樓日與同志荒宴其上少有醒
時邑人皆以白重名望其樓而加敬焉

出本
事詩

好尚

房館

蘇州洞庭杭州興德寺房太尉瑄云不遊興德洞庭未見佳處壽安縣有噴玉泉石溪皆山水之勝絕者也貞元中瑄以賓客辭為縣令乃剡翳薈開徑隧人聞而異焉太和初博陵崔蒙為主簿標準於道周人方造而遊焉又顏太師真卿刻姓名於石或置之高山之上或沈之大洲之底而云安知不有陵谷之變耶

出傳記

韓愈

韓愈好竒與客登華山絕峯度不能返發狂慟哭為遺

書華陰令令百計取之乃下又李氏子為千牛與其儕類登慈恩寺浮圖窮危極險躍出檻外失身而墜頰腰帶掛釘為風所搖久而未落同登者驚倒檻中不能復起院僧遙望急呼一寺悉出以救之乃連衣為繩久之

取下經宿而蘇

出國史補

李約

兵部員外郎李約汧公之子也以近屬宰相子而雅愛玄機蕭蕭冲遠德行既優又有山林之致琴道酒德詞

調皆高絕一時一生不近女色性喜接引人物而不好俗談晨起草裹頭對客感融便過一日多蓄古器在潤州嘗得古鐵一片擊之清越又養一猿名山公常以之隨逐月夜泛江登金山擊鐵鼓琴猿必嘯和傾壺達夕不俟外賓醉而後已約會佐李庶人錡浙西幕約初至金陵於府主庶人錡坐屢讚招隱寺標致一日庶人宴於寺中明日謂約曰十郎嘗誇招隱寺昨遊宴細看何殊州中李笑曰某所賞者疎野耳若遠山將翠幕遮古

松用彩物裹腥膻浣鹿跑泉音樂亂山鳥聲此則實不
如在叔父大廳也庶人大笑約性又嗜茶能自煎謂人
曰茶須緩火炙活火煎活火謂炭火之焰火也客至不
限甌數竟日執持茶器不倦曾奉使行硤石縣東愛渠

水清流旬日忘發

出因
話錄

陸鴻漸

太子文學陸鴻漸名羽其生不知何許人竟陵龍蓋寺
僧姓陸于堤上得一初生兒收育之遂以陸為氏及長

聰俊多聞學贍辭逸恢諧談辯若東方曼倩之儔鴻漸
性嗜茶始創煎茶法至今鬻茶之家陶為其像置於錫
器之間云宜茶足利至大和復州有一老僧云是陸生
弟子常諷歌云不羨黃金壘不羨白玉杯不羨朝入省
不羨暮入臺唯羨西江水曾向晉陵城下來鴻漸又撰
茶經二卷行於代今為鴻漸形者因目為茶神有交易
則茶祭之無以釜湯沃之

出傳
載

獨孤及

獨孤常州及末年尤嗜鼓琴得眼病不理意欲專聽出傳載

杜兼

杜兼嘗聚書萬卷每卷後必自題云清俸寫來手自校汝曹讀之知聖道墜之為不孝出傳載

李德裕

李德裕與同列款曲或有徵所好者德裕言已喜見未聞新書策崔魏公鉉好食新餼頭以為珍美從事開筵

一日前必到使院索新煮饀頭也杜幽公悰每早食饋
飯乾脯崔侍中安潛好看鬪牛雖各有所美而非近利
與夫牙籌金埒錢癖穀堆不其遠乎

出北夢
瑣言

潘彥

咸亨中貝州潘彥好雙陸每有所詣局不離身曾泛海
遇風船破彥右手挾一板左手抱雙陸局口銜雙陸骰
子二日一夜至岸兩手見骨局終不捨骰子亦在口

出朝

野僉
載

宋之孫

洛陽縣丞宋之孫性好唱歌出為連州參軍刺史陳希古者庸人也令之孫教婢歌每日端笏立於庭中啾啾而唱其婢隔窻從而和之聞者無不大笑

出朝野僉載

朱前疑

兵部郎中朱前疑貌醜其妻有美色天后時洛中殖業坊西門酒家有婢蓬頭垢面偃肩皤腹寢惡之狀舉世所無而前疑大悅之殆忘寢食乃知前世言宿瘤蒙愛

信不虛也夫人世嗜慾一何殊性前聞文王嗜昌歠楚
王嗜芹藟屈到嗜芰曾皙嗜羊棗宋劉雍嗜瘡痂本傳
曰雍詣前吳興太守孟靈休靈休脫襪粘炙瘡痂墜地
雍俯而取之飡焉宋明帝嗜蜜漬蝻蜋每啖數升是知
海上逐臭之談陳君愛醜之說何其怪歟天與其癖也

出朝野
僉載

鮮于叔明

劔南東川節度鮮于叔明好食臭蟲時人謂之蟠蟲每

散令人採拾得三五升即浮之微熱水中以抽其氣盡
以酥及五味熬之卷餅而啖其味實佳

出乾
腩子

權長孺

長慶末前知福建縣權長孺犯事流貶後以故禮部相
國德輿之近宗遇恩復資留滯廣陵多日賓府相見皆
鄙之將詣闕求官臨行羣公飲餞於禪智精舍狂士蔣
傳知長孺有嗜人爪癖乃於步健及諸傭保處薄給酬
直得數兩削下爪或洗濯未精以紙裹候其酒酣進曰

侍御遠行無以餞送今有少佳味敢獻遂進長孺長孺
視之忻然有喜色如獲千金之惠涎流於吻連撮噉之

神色自得合坐驚異

出乾
腴子

太平廣記卷二百一

欽定四庫全書

太平廣記卷二百二

儒行

劉獻之

盧景裕

蕭德言

張楚金

憐才

沈約

唐高宗

天后

源乾曜

張建封

李實

韓愈

楊敬之

盧肇

令狐綯

崔鉉

高逸

孔稚圭

李元誠

陶弘景

田遊巖

朱桃椎

盧鴻

元結

賀知章

顧況

陳叔

孔拯

儒行

劉獻之

後魏劉獻之少好學尤精詩傳泛觀子史見名法之言
掩卷而笑曰若使楊墨之流不為此書千載誰知少也
又謂所親曰觀屈原離騷之作自是狂人死何足惜時
人有從之學者獻之曰立身雖百行殊途准之四科要
以德行為首子若能入孝出悌忠信仁讓不待出戶天
下自知倘不能然雖復下帷針股躡履從師止可博聞
強識不過為土龍乞雨眩惑將來其於立身之道何益

乎孔門之徒初亦未悟見吾丘之歎方乃歸而養親嗚呼先達之人何自覺之晚也由是四方學者慕之歎曰吾不如莊周樗散遠矣固以疾辭

出談數

盧景裕

范陽盧景裕太常靜之子司空同之猶子少好閑默馳騁經史守道恭素不以榮利居心時號居士焉初頭生一叢白毛數之四十九莖故偏好老易為注解至四十九而卒故小字白頭性端謹雖在暗室必矜莊自持盛

暑之月初不露袒妻子相對有若嚴賓歷位中書侍郎

出談
數

蕭德言

唐蕭德言篤志於學每開五經必盥濯束帶危坐對之
妻子謂曰終日如是無乃勞乎德言曰敬先師之言豈

憚於此乎

出談
賓錄

張楚金

張楚金與越石同預鄉貢進士州司將罷越石而貢楚

金楚金辭曰以順即越石長以才即楚金不如固請俱
退李勣為都督歎曰貢士本求才行相推如此何嫌雙

舉乃薦擢第

出談
賓錄

憐才

沈約

梁瑯邪王筠幼而清麗文采逸艷為沈約所賞及沈為
尚書令筠為郎謂筠曰僕昔與王謝諸賢為文會之賞
自零落以來朽疾相繼平生翫好殆欲都絕而一文一

詠此事不衰不意疲暮復遇盛德昔伯喈見王仲宣歎
曰此王公之孫吾家書籍萬卷必當相與僕雖不敏請
慕斯言每商確書史檢閱篇章畢夜闌景以為得志之
賞筠歷位司徒左長史度支尚書

出談
藪

唐高宗

胡楚賓屬文敏速每飲酒半酣而後操筆高宗每令作
文必以金銀盃盛酒令飲便以盃賜之

出談
賓錄

天后

則天幸龍門令從官賦詩左史東方虬詩先成則天以錦袍賜之及宋之間詩成則天稱詞更高奪袍以賜之

出談
賓錄

源乾曜

源乾曜因奏事稱旨上悅之於是驟拔用歷戶部侍郎京兆尹以至宰相異日上獨與高力士語曰汝知吾拔用乾曜之速乎曰不知也上曰吾以容貌言語類蕭至忠故用之對曰至忠不嘗負陛下乎陛下何念之深也

上曰至忠晚乃謬計耳其初立朝得不謂賢相乎上之
愛才者過聞者莫不感悅

出國
史補

張建封

崔膺性狂張建封愛其文以為客隨建封行營夜中大
叫驚軍軍士皆怒欲食其肉建封藏之明日置宴監軍
曰某有與尚書約彼此不得相違建封曰唯監軍曰某
有請請崔膺建封曰如約遂巡建封又曰某亦有請却
請崔膺座中皆笑後乃得免

出國
史補

李實

李實為司農卿促責官租蕭祐居喪輸不及期實怒召至租車亦至故得不罪會有賜與當為謝狀常秉筆者方有故實急乃曰名衣齊衰者祐至立為草狀實大喜延英薦之德宗令問喪期屈指以待及釋服之明日自處士拜拾遺祐有文章善畫好鼓琴其拔擢乃偶然耳

出國
史補

韓愈

李賀字長吉唐諸王孫也父璿肅邊上從事賀年七歲以長短之歌名動京師時韓愈與皇甫湜賢賀所業竒之而未知其人因相謂曰若是古人吾曹不知者若是今人豈有不知之理會有以璿肅行止言者二公因連騎造門請其子既而總角荷衣而出二公不之信因面試一篇賀承命欣然操觚染翰旁若無人仍目曰高軒過曰華裾織翠青如蔥金環壓轡搖玲瓏馬蹄隱隱聲隆隆入門下馬氣如虹云是東京才子文章鉅公二十

八宿羅心胸殿前作賦聲摩空筆補造化天無功元精
耿耿貫當中龐眉書客感秋蓬誰知死草生華風我今
垂翅負天鴻他日不羞蛇作龍二公大驚遂以所乘馬
命聯鑣而還所居親為束髮年未弱冠丁內艱他日舉
進士或謗賀不避家諱文公時著辨諱一篇不幸未壯

室而終

出撫
言

又

韓愈引致後輩為舉科第多有投書請益者時人謂之

韓門弟子後官高不復為也

出國
史補

楊敬之

楊敬之愛才公正嘗知江表之士項斯贈詩曰處處見
詩詩總好及觀標格過於詩平生不解藏人善到處相
逢說項斯因此遂登高科也

出尚書
故實

盧肇

王鐐富有才情數舉未捷門生盧肇等公薦於春官云
同盟不嗣賢者受譏相子負薪優臣致誚乃旌鐐嘉句

全唐詩話卷之二
卷二百二
曰擊石易得火扣人難動心今日朱門者曾恨朱門深
聲聞藹然果擢上第

出打
情詩

令狐綯

宣皇坐朝次對官趨至前必待氣息平勻上然後問事
令狐綯進李遠為杭州刺史宣皇曰我聞李遠詩云長
日唯銷一局棋豈可以臨郡哉對曰詩人之言不足有
實也仍薦遠廉察可任乃俞之

出幽
間
鼓吹

崔鉉

鄭愚尚書廣州人擢進士第歿歷清顯聲甚高而性好華以錦為半臂崔魏公鉉鎮荆南鄭授廣南節制路由渚官鉉以常禮待之鄭為進士時未嘗以文章及魏公門至是乃贄所業魏公覽之深加歎賞曰真銷得錦

半臂也

出北夢瑣言

高逸

孔稚珪

齊會稽孔稚珪光祿靈產之子侍中道隆之孫張融之

內弟稚珪富學與陸思曉謝淪為君子之交珪不樂世
務宅中草没人南有山池春日蛙鳴僕射王晏嘗鳴笳
鼓造之聞羣蛙鳴晏曰此殊聒人耳答曰我聽卿鼓吹
殆不及此晏有愧色歷位太子詹事贈光祿大夫

出談藪

李元誠

北齊趙郡李元誠鉅鹿貞公恢之孫鉅鹿簡公之曾孫
孫性放誕不好世務以飲酒為務為太常卿太祖欲以
為僕射而疑其多酒子騷諫之元誠曰我言作僕射不

如飲酒樂耳愛僕射宜勿飲酒行臺尚書司馬子如及
孫騰嘗詣元誠其庭宇蕪曠環堵頽圯在樹下以被自
擁獨對一壺陶然樂矣見其妻衣不曳地撒所坐布褥
質酒肉以盡歡意焉二公嗟尚各置餉饋受之而不辭
散之親故元誠一名元忠拜儀同領衛尉封晉陽公卒

贈司徒諡曰文宣

出談
藪

陶弘景

丹陽陶弘景幼而慧博通經史覩葛洪神仙傳便有志

於養生每言仰視青雲白日不以為遠初為宣都王侍
讀後遷奉朝請永平中謝職隱茅山山是金陵洞穴周
迴一百五十里名曰華陽洞天有三茅司命之府故時
號茅山由是自稱華陽隱居人間書疏皆以此代名亦
士安之元晏稚川之抱朴也惟愛林泉尤好著述縉紳
士庶稟道伏膺承流向風千里而至先生嘗曰我讀外
書未滿萬卷以內書兼之乃當小出耳齊高祖問之曰
山中何所有引景賦詩以答之詞曰山中何所有嶺上

多白雲只可自怡悅不堪持寄君高祖賞之

出談
數

田遊巖

唐田遊巖初以儒學累徵不起侍其母隱嵩山甘露中
中宗幸中嶽因訪其居遊巖出拜詔命中書侍郎薛元
起入問其母御題其門曰隱士田遊巖宅徵拜弘文學

士

出翰林
盛事

朱桃樵

朱桃樵蜀人也澹泊無為隱居不仕披裘帶索沈浮人

間竇軌為益州聞而名之遺以衣服逼為鄉正桃椎不言而退逃入山中夏則裸形冬則以樹皮自覆凡所贈遺一無所受織芒屨置之於路見者皆曰朱居士之屨也為鬻取米置之本處桃椎至夕取之終不見人高士廉下車深加禮敬召至降階與語桃椎不答瞪目便去士廉每加褒異蜀人以為美談

出大唐新語

盧鴻

玄宗徵嵩山隱士盧鴻三詔乃至及謁見不拜但磬折

而已問其故鴻對曰臣聞老子云禮者忠信之薄不足
可依山臣鴻敢以忠信奉上玄宗異之召入賜宴拜諫
議大夫賜章服並辭不受給米百石絹百疋送還隱居

之處

出大唐
新語

元結

天寶之亂元結自汝濱大率隣里南投襄漢保全者千
餘家乃舉義師宛葉之間有嬰城捍寇之力結天寶中
師中行子始在商於之山稱元子逃難入猗玗之山稱

猗玗子或稱浪士漁者呼為聾叟酒徒呼為曼叟及為

官呼漫郎

出國
史補

賀知章

賀知章性放曠美談笑當時賢達咸傾慕陸象先即知章姑子也知章特相親善象先謂人曰賀兄言論調態真可謂風流之士晚年縱誕無復規檢自號四明狂客醉後屬詞動成篇卷文不加點咸有可觀又善草隸書好事者共傳寶之請為道士歸鄉捨宅為觀上許之仍

拜子為會稽郡司馬御製詩以贈行

出談
審錄

顧況

顧況志尚踈逸近於方外有時宰曾招致將以好官命之況以詩答之曰四海如今已太平相公何事喚狂生此身還似籠中鶴東望滄溟叫數聲後吳中皆言況得道解化去

出尚書
故實

陳琬

陳琬鴻之子也鴻與白傅傳長恨詞文格極高蓋良史

也咸通中佐廉使郭常侍銓之幕于徐性尤耿介非其人
人不與之交同院有小計姓武亦元衡相國之後蓋汾
陽之坦牀也乃心不平之遂挈家居于茅山與妻子隔
山而居短褐束絛焚香習禪而已或一年半載與妻子
略相面焉在職之時唯流溝寺長老與之歛接亦具短
褐相見自述檀經三卷今在藏中臨行留一章與其僧
云行若獨輪車常畏大道覆止若圓底器常恐他物觸
行止既如此安得不離俗乾符中弟璉復佐薛能幕于

徐自丹陽棹小舟至于彭門與弟相見薛公重其為人延請入城遂堅拒之曰某已有誓不踐公門矣薛乃攜舟造之話道永日不宿而去其志尚之介僻也如此

出玉

堂閒話

孔拯

孔拯侍郎為遺補時嘗朝回值雨而無雨備乃於人家簷廡下避之過食時雨益甚其家乃延入廳事有一叟出迎甚恭備酒饌亦甚豐潔公侯家不若也拯慚謝之

且假雨具叟曰某閒居不預人事寒暑風雨未嘗冒也
置此欲安施乎令於他處假借以奉之拯退而嗟歎若
忘宦情語人曰斯大隱者也

出北夢
瑣言

太平廣記卷二百二

欽定四庫全書

太平廣記卷二百三

樂一

舜白玉琯

師延

師曠

師涓

楚懷王

咸陽宮銅人

隋文帝

唐太宗

衛道弼曹紹夔

裴知古

李嗣真

宋沈

王仁裕

李師誨

琴

璵璠樂

劉道強

趙后

馬融

楊秀

李勉

張弘靖

董庭蘭

蔡邕

于頔

韓臯

王中散

瑟

盧邁

阮咸

樂一

舜白玉琯

舜之時西王母來獻白玉琯漢章帝時零陵文學奚景
於冷道舜祠下得笙白玉琯知古以玉為琯後乃易之
以竹為琯耳夫以玉作音故神人和鳳凰儀也

出風俗通

師延

師延者殷之樂工也自庖皇以來其世遵此職至師延
精述陰陽曉明象緯終莫測其為人世載遼絕而或出
或隱在軒轅之世為司樂之官及乎殷時總修三皇五

帝之樂撫一絃之琴則地祇皆升吹玉律則天神俱降
當軒轅之時已年數百歲聽衆國樂聲以審世代興亡
之兆至夏末抱樂器以奔殷而紂淫於聲色乃拘師延
於陰宮之內欲極刑戮

陰宮囚人之所

師延既被囚繫奏清商

流徵調角之音司獄者以聞於紂紂猶嫌曰此乃淳古遠
樂非余可聽悅也猶不釋師延乃更奏迷魂淫魄之曲
以歡修夜之娛乃得免炮烙之害聞周武王興師乃越
濮流而逝或云其後死於水府故晉衛之人鑄石鑄金

圖畫以象其形立祠不絕矣

出王
子年
拾遺記

師曠

師曠者或云出於晉靈之世以主樂官妙辯音律撰兵書萬篇時人莫知其原裔出沒難詳也晉平公時以陰陽之學顯於當世乃薰目為瞽以絕塞衆慮專心於星筭音律考鍾呂以定四時無毫釐之異春秋不記師曠出於何帝之時曠知命欲終乃述寶符百卷至戰國分爭其書滅絕矣晉平公使師曠奏清徵師曠曰清徵不

如清角也公曰清角可得聞乎師曠曰君德薄不足聽之聽之將恐敗公曰寡人老矣所好者音願遂聽之師曠不得已而鼓一奏之有雲從西北方起再奏之大風至大雨隨之掣帷幕破俎豆墮廊瓦坐者散走平公恐懼伏於廊室晉國大旱赤地三年平公之身遂病

出王
子年

拾遺
記

師涓

師涓者出於衛靈公之世能寫列代之樂善造新曲以

代古聲故有四時之樂春有離鴻去雁應蘋之歌夏有
明晨焦泉之華流金之調秋有商飈白雲落葉吹蓬之
曲冬有疑河流陰沉雲之操此四時之聲奏於靈公公
情涵心惑忘於政事蘧伯玉諫曰此雖以發揚氣律終
為沉湎靡曼之音無合於風雅非下臣宜薦於君也靈
公乃去新聲而親政務故衛人美其化焉師涓悔其違
於雅頌失為臣之道乃退而隱迹伯玉焚其樂器於九
達之衢恐後世傳造焉其歌曲湮滅世代遼遠唯紀其

篇目之大意也

出王子年拾遺記

楚懷王

洞庭之山浮於水上其下金堂數百間帝女居之四時
聞金石絲竹之音徹於山頂楚懷王之時與羣才賦詩
於水湄故云瀟湘洞庭之樂聽者令人難老雖咸池簫
韶不能比焉每四仲之節王嘗繞山以遊宴各舉四仲
之氣以為樂章惟仲春律中夾鐘乃作輕流水之詩宴
於山南時中蕤賓乃作皓露秋霜之曲其後懷王好進

姦雄羣賢逃越屈平以忠見斥隱於沅澧之間王廼逐
不已乃赴清泠之淵楚人思慕之謂之水仙

出王子年拾遺記

咸陽宮銅人

秦咸陽宮中有鑄銅十二枚坐高皆三五尺列在一筵
上琴筑竽笙各有所執皆組綬華采儼若生人筵下有
銅管上口高數尺其一管空內有繩大如指使一人吹
空管一人紐繩則琴瑟竽筑皆作與真樂不異

出西京雜記

隋文帝

隋文帝開皇十四年於翟泉獲玉磬十四懸之於庭有

二素衣神人來擊之其聲妙絕

出洽
間記

唐太宗

唐太宗留心雅正勵精文教乃命太常卿祖孝孫正宮
商起居郎呂才習音韻協律郎張文收考律呂平其散
濫為之折衷作降神樂為九功舞天下靡然向風矣初
孝孫以梁陳舊樂雜用吳楚之音周齊舊樂多涉胡戎
之伎於是斟酌南北考以古音而作大唐雅樂以十二

律各順其月旋相為宮按禮記云大樂與天地同和詩序云太平之音安以樂其政和故制十二和之樂合三十曲八十四調祭園丘以黃鐘為宮方澤以大呂為宮宗廟以太簇為宮五郊迎享則隨月用律為宮初隋但用黃鐘一宮唯扣七鐘餘五虛懸而不扣及孝孫造旋宮之法扣鐘皆遍無復虛懸矣時張文收善音律以蕭吉樂譜未甚詳悉取歷代沿革截竹為十二律吹之備盡旋宮之義太宗又召文收於太常令與孝孫參定雅

樂太樂古鐘十二俗號啞鐘莫能通者文收吹律調之
聲乃暢徹知音樂者咸服其妙授協律郎及孝孫卒文
收始復採三禮更加釐革而樂教大備矣

出譚
賓錄

又

潤州曾得玉磬十二以獻張率更扣其一曰晉某歲所
造也是歲閏月造磬者法月數當有十三箇闕其一宜
如黃鐘東九尺掘必得焉求之如言而得

出國史
纂異

又

貞觀中景雲見河水清張率更制為景雲河清歌名曰

燕樂今元會第一奏是也

出國史
纂異

又

太宗之平劉武周河東士庶歌舞於道軍人相與作秦

王破陣樂之曲後編樂府云

附

又

破陣樂被甲持戟以象戰事慶善樂長袖曳屣以象文
德鄭公見奏破陣樂則俯而不視慶善樂則翫之不厭

出國史
纂異

衛道弼曹紹夔

樂工衛道弼天下莫能以聲欺者曹紹夔與道弼偕為
太樂合享北郊御史怒紹夔欲以樂不和為罪雜叩鐘
磬聲使夔聞名之無誤者由是反歎伏洛陽有僧房中
磬子夜輒自鳴僧以為怪懼而成疾求術士百方禁之
終不能已夔與僧善來問疾僧具以告俄擊齋鐘復作
聲紹夔笑曰明日可設盛饌當為除之僧雖不信紹夔

言冀其或效乃具饌以待之夔食訖出懷中錯鏤磬數處而去其聲遂絕僧苦問其所以夔云此聲與鐘律合擊彼此應僧大喜其疾亦愈

出國史纂異

裴知古

裴知古奏樂謂元行冲曰金石諧和當有吉慶之事其在唐室子孫耳其月中宗即位

出譚賓錄

又

知古直太常路逢乘馬者聞其聲竊言曰此人即當墮

馬好事者隨而觀之行未半坊馬驚殆死又嘗觀人迎婦聞婦珮玉聲曰此婦不利姑是日姑有疾竟亡善於攝生開元十二年年百歲而卒

出國史纂異

李嗣真

唐朝承周隋離亂樂懸散失獨無徵音國姓所闕知者不敢言達其事天后末御史大夫李嗣真密求之不得一旦秋爽聞砧聲者在今弩營是當時英公宅又數年無由得之其後徐敬業反天后溺其宮嗣真乃求得喪車

一鐺入振之於東南隅果有應者遂掘之得石一段裁
為四具補樂懸之闕後享宗廟郊天掛篋簾者乃嗣真
所得也

出獨異志

宋沆

宋沆為太樂令知音近代無比太常久亡徵調沆考鍾

律得之

出國史補

沆為太常丞嘗一日早於光宅佛寺待漏聞塔上風鐸
聲傾聽久之朝迴復止寺舍問寺主僧曰上人塔鈴皆

知所自乎曰不能知沈曰其間有一是古製某請一登塔循金索試歷扣以辨之可乎僧初難後許乃扣而辨焉在寺之人即言往往無風自搖洋洋有聞非此耶沈曰是耳必因祠祭考夔懸鍾而應之固求摘取而觀之曰此姑洗之編鍾耳請旦獨掇於僧庭歸太常令樂工與僧同臨之約其時彼知夔懸此果應遂購而獲焉又會送客出通化門逢度支運乘駐馬俄頃忽草草揖客別乃隨乘行認一鈴言亦編鍾也他人但覺鎔鑄獨工

不與衆者埒莫知其餘及配懸音形皆合其度異乎此亦識徵在金奏者與

出羯鼓錄

王仁裕

晉都洛下丙申年春翰林學士王仁裕夜直聞禁中蒲牢每發聲如叩項腦之間其鐘忽撞作索索之聲有如破裂如是者旬餘每與同職默議罔知其何兆焉其年中春晉帝果幸於梁汴石渠金馬移在雪宮迄今十三年矣索索之兆信而有徵

出玉堂閒話

李師誨

李師誨者畫番馬李漸之孫也為劉從諫潞州從事知從諫不軌遂隱居黎城山潞州平朝廷嘉之就除縣宰會於衲僧處得落星石一片僧云於蜀路早行見星墜於前遂掘之得一片石如斷磬其石端有雕刻狻猊之首亦如磬有孔穿條處尚光滑豈天上奏樂器毀而墜歟此石流轉到安邑李甫宅中

出尚書故實

琴

璵璠樂

秦咸陽宮有琴長六尺安十三絃二十六徽皆七寶飾

之銘曰璵璠之樂

出西京雜記

劉道強

齊人劉道強善彈琴能作單息寡鶴之弄聽者皆悲不

能自攝

出西京雜記

趙后

趙后有寶琴曰鳳凰皆以金玉隱起為龍鳳螭鸞古賢

烈女之象亦善為歸風送遠之操焉

出西京雜記

馬融

馬融歷二郡兩縣政務無為事從其約在武都七年南郡四年未嘗按論刑殺一人性好音樂善鼓琴吹笛每

氣出蜻蛉相和

出高芸小說

楊秀

隋文帝子蜀王秀嘗造千面琴散在人間

出尚書故實

李勉

唐沂公李勉好雅琴嘗取桐梓之精者雜綴為之百衲
琴用蝸殼為徽其間三面尤絕異通謂之嚮泉韻磬絃
一上可十年不斷

出尚書
故實

又

勉又取漆簫為之多至數百張求者與之有絕代者一
名嚮泉一名韻磬自寶於家

闕

又

京中又以樊氏路氏琴為第一路氏有房太尉石枕損

處惜而不治蜀中雷氏斲琴常自品第上者以玉徽次者以寶徽又次者以金螺蚌徽

闕

張弘靖

張相弘靖夜會名家觀鄭宥調二琴至切各置一榻動宮則宮應動角則角應稍不切乃不應宥師董庭蘭尤

善況聲祝聲

出國史補

董庭蘭

嚮泉韻磬本落樊澤司徒家後在珠崖宅又在張彥遠

宅今不知流落何處彈琴近代稱賀若夷甘黨前有董
庭蘭陳懷古懷能况祝二家聲謂大小胡笳也蕭古亦
善琴云胡笳第四頭犯無射商遂用其音為蕭氏九弄

出盧氏

雜說

蔡邕

蔡邕在陳留其鄰人有以酒食召邕比往而酒會已酣
馬客有彈琴者邕至門潛聽之曰嘻以樂召我而有殺
心何也遂返將命者告主人主人遽自追而問其故邕

具以告琴者曰我向鼓絃見螿螂方向鳴蟬蟬將去螿螂為之一前一却吾心唯恐螿螂之失蟬也此豈為殺心而聲者乎邕歎曰此足以當之矣

出漢書

于頔

于司空頔常令客彈琴其嫂知音聽於簾下歎曰三分之中一分箏聲二分琵琶聲無本色韻

出國史補

韓臯

韓臯生知音律嘗觀彈琴至止息歎曰妙哉稽生之為

是也其當晉魏之際其音主商商為秋聲秋也者天將
搖落肅殺其歲之晏乎又晉承金運之聲也此所以知
魏之季而晉將代之也慢其商絃以宮同音是臣奪君
之義也此所以知司馬氏之將篡也司馬懿受魏明帝
顧托後反有篡奪之心自誅曹爽逆節彌露王陵都督
揚州謀立楚王彪毋丘儉文欽諸葛誕前後相繼為揚
州都督咸有匡復魏室之謀皆為懿父子所殺叔夜以
揚州故廣陵之地彼四人者皆魏室文武大臣咸散敗

於廣陵故名其曲為廣陵散言魏氏散亡自廣陵始也
止息者晉雖暴興終止息於此也其哀憤感慘痛迫切
之音盡在於是永嘉之亂是其應乎叔夜撰此將貽後
代之知音者且避晉禍所以託之鬼神也臯之於音可

謂至矣

出盧氏
雜記

王中散

唐乾符之際黃巢盜據兩京長安士大夫避地北遊者
多矣時有前翰林待詔王敬傲長安人能碁善琴風骨

清峻初自蒲坂歷於并并帥鄭從謹以相國鎮汾晉傲
謁之不見禮後又之鄴時羅紹威新立方撫士卒務在
戰爭敬傲在鄴中數歲時李山甫文筆雄健名著一方
適於道觀中與敬傲相遇又有李處士亦善撫琴山甫
謂二客曰幽蘭綠水可得聞乎敬傲即應命而奏之聲
清韻古感心動神曲終敬傲潛然返袂云憶在咸通王庭
秋夜供奉至尊之際不意流離於此也李處士亦為白
鶴之操山甫援毫抒思以詩贈曰幽蘭綠水耿清音歎

息先生枉用心世上幾時曾好古人前何必苦霑襟餘
句未成山甫亦自黯然悲其未遇也王生因別彈一曲
坐客彌加悚敬非尋常之品調山甫遂命酒停絃各引
滿數杯俄而玉山俱倒洎酒醒山甫方從容問曰向來
所操者何曲他處未之有也王生曰某家習正音奕世
傳受自由德順以來待詔金門之下凡四世矣其常所
操弄人衆共知唯嵇中散所受伶倫之曲人皆謂絕於
洛陽東市而不知有傳者余得自先人名之曰廣陵散

也山甫早疑其音韻殆似神工又見王生之說即知古
之廣陵散或傳於世矣遂成四韻載於詩集今山甫集
中只標李處士蓋寫錄之誤耳由是李公常目待詔為
王中散也王生後又遊常山是時節帥王鎔年在幼齡
初秉戎鉞方延多士以廣令名時有李夔郎中莫又玄
祕書蕭珣員外張道古並英儒才學之士咸自四集於
文華館故待詔之琴碁亦見禮於賓榻歲時供給莫不
豐厚王或命揮絃動軫必大加錫遺焉在常山十數年

甚承禮遇敬傲每戴危冠着高屐優遊嘯詠而已冬月亦葛巾單衣體無綿纊日醺酣於市人咸怪異之間昭宗返正辭歸帝里後不知所終敬傲又能衣袖中剪紙為蜂蝶舉袂令飛滿於四座或入人之襟袖以手攬之即復於故所也當時咸疑有神仙之術張道古與相善每欽其道藝會者王逸人傳為此也道古名覲博學善古文讀書萬卷而不好為詩曾在張楚夢座上時久旱忽大雨衆賓皆喜而詠之道古最後方成絕句曰亢暘

今已久喜雨自雲傾一點不斜去極多時下成坐客重
其文學之名而哂其詩之拙也

出耳
目記

瑟

盧邁

盧中丞邁有寶瑟四各直數十萬有寒玉石磬響泉和

至之號

出傳
記

阮咸

元行冲賓客為太常少卿時有人於古墓中得銅物似

琵琶而身正圓莫有識者元視之曰此阮咸所造樂也
乃令匠人改以木為聲清雅今呼為阮咸者是也

出國史纂

異

又

晉書稱阮咸善彈琵琶後有發咸墓者得琵琶以瓦為
之時人不識以為於咸墓中所得因名阮咸近有能者
不少以琴合調多同之

出盧氏誰說

太平廣記卷二百三

欽定四庫全書

太平廣記卷二百四

樂二

大酺

梨園樂

太真妃

天寶樂章

韋臯

于頔

文宗

沈阿翹

懿宗

王令言

寧王獻

王仁裕

歌

秦青韓娥

戚夫人

李龜年

李袞

韓會

米嘉榮

笛

昭華管

唐玄宗

漢中王瑀

李暮

許雲封

呂鄉筠

箏

李蔚

樂二

大酺

唐玄宗在東洛大酺於五鳳樓下命三百里內縣令刺史率其聲樂來赴闕者或謂令較其勝負而賞罰焉時河內郡守令樂工數百人於車上皆衣以錦繡伏廂之牛蒙以虎皮及為犀象形狀觀者駭目時元魯山遣樂工數十人聯袂歌于為于為魯山之文也玄宗聞而異之徵其詞乃歎曰賢人之言也其後上謂宰臣曰河內之人其在塗炭乎促命徵還而授以散秩每賜宴設酺

會則上御勤政樓金吾及四軍兵士未明陳仗盛列旗
幟皆被黃金甲衣短後繡袍太常陳樂衛尉張幕後諸
蕃酋長就食府縣教坊大陳山車旱船尋撞走索丸劍
角抵戲馬鬪雞又令宮女數百飾以珠翠衣以錦繡自
帷中出擊雷鼓為破陣樂太平樂上元樂又引大象犀
牛入場或拜舞動中音律每正月望夜又御勤政樓觀
作樂貴臣戚里官設看樓夜闌即遣宮女於樓前歌舞

以娛之

出明皇
雜錄

梨園樂

天寶中玄宗命宮女數百人為梨園弟子皆居宜春北
院上素曉音律時有馬仙期李龜年賀懷智皆洞知律
度安祿山自范陽入覲亦獻白玉簫管數百事皆陳於
梨園自是音響殆不類人間

出譚
審錄

太真妃

太真妃多曲藝最善擊磬拊搏之音玲玲然多新聲雖
太常梨園之能人莫能加也玄宗令採藍田綠玉琢為

磬尚方造莫簾流蘇之屬皆以金鈿珠翠珍怪之物雜飾之又鑄金為二獅子拏攫騰奮之狀各重二百餘斤以為趺其他綵繪縟麗製作精妙一時無比也及上幸蜀回京師樂器多亡失獨玉磬偶在上顧之悽然不忍置於前促令載送太常寺至今藏於太樂署正聲庫者

是也

出開天
傳信記

天寶樂章

天寶中樂章多以邊地為名若涼州甘州伊州之類是

焉其曲遍繁聲名入破後其地盡為西蕃所沒破乃其

兆矣

出傳
載錄

韋臯

韋臯鎮西川進奉聖樂曲兼與舞人曲譜同進到京於

留邸按閱教坊數人潛窺因得先進

出盧氏
雜說

于頔

于司空頔因韋太尉奉聖樂亦撰順聖樂以進每宴必
使奏之其曲將半行綴皆伏而一人舞於中央幕客韋

緩笑曰何用窮兵獨舞雖詼諧亦各有為也頓又令女

妓為佾舞雄健壯妙號孫武順聖樂

出國史補

文宗

文宗善吹小管時法師文淑為入內大德一日得罪流
之弟子入內收拾院中籍入家具輩猶作法師講聲上

採其聲為曲子號文淑子

出盧氏雜說

沈阿翹

文宗時有宮人沈阿翹為上舞河滿子聲詞風態率皆

宛暢曲罷上賜金臂環即問其從來阿翹曰妾本吳元
濟之妓元濟敗因以聲得為宮娥遂自進白玉方響云
本吳元濟所有也光明潔冷可照十數步言其槌即犀
也凡物有聲乃響其中焉架則云檀香也而文彩若雲
霞之狀芬馥著人則彌月不散製度精妙故非中國所
有上因令阿翹奏涼州曲音韻清越聽者無不愴然上
謂之曰天上樂仍選內人與阿翹為弟子

出杜陽
雜編

懿宗

懿宗一日召樂工上方奏樂為道調弄上遂拍之故樂工依其節奏曲子名道調子十宅諸王多解音聲倡優雜戲皆有之以備上幸其院迎駕作樂禁中呼為音聲

郎君

出盧氏雜說

王令言

隋煬帝幸江都時樂工王令言子自內歸令言問其子今日所進曲子何曰安公子令言命其子奏之曰汝不須隨駕去此曲子無宮聲上必不迴果如其言

出盧氏雜說

寧王獻

西涼州俗好音樂製新曲曰涼州開元中列上獻之上
名諸王於便殿同觀焉曲江諸王拜賀蹈舞稱善獨寧
王不拜上顧問之寧王進曰此曲雖佳臣有所聞焉夫
音也始之於宮散之於商成之於角徵羽莫不根蒂而
襲於宮商也斯曲也宮離而少徵商亂而加暴臣聞宮
君也商臣也宮不勝則君勢卑商有餘則臣事僭卑則
逼下僭則犯上發於忽微形於音聲播之於詠歌見之

於人事臣恐異日有播越之禍悖逼之患莫不兆於斯
曲也上聞之默然及安史亂作華夏鼎沸所以見寧王
審音之妙也

出開天
傳信記

王仁裕

後唐清泰之初王仁裕從事梁苑時范公延光師之春
正月郊野尚寒引諸幕寮饒朝客于折柳亭樂則於羽
而響鐵獨有宮聲洎將慘執竟不諧和王獨訝之私謂
戎判李大夫式管記唐員外獻曰今日必有譁張之事

蓋樂音不和今諸音舉羽而獨扣金有宮聲且羽為水
宮為土水土相剋得無憂乎于時筵散朝客西歸范公
引賓客紿鷹犬獵于王婆店北為奔馬所墜不救于荒
陂自辰已至午後絕而復蘇樂音先知良可驗矣

出玉
堂閒

話

歌

秦青韓娥

薛談學謳於秦青未窮青之技自謂盡之遂辭去歸秦

青弗止餞於郊衢撫節悲歌聲振林木響過行雲談謝
求返終身不敢言歸秦青顧謂其友曰昔韓娥東之齊
匱糧過雍門鶯歌假食既去而餘音繞梁三日不絕左
右以其人弗去過逆旅旅人辱之韓娥因曼聲哀哭一
里老幼悲愁涕泣相對三日不食遽追而謝之娥復曼
聲長歌一里老幼歡喜抃舞弗能自禁乃厚賂而遣之
故雍門之人至今善歌善哭效娥之遺聲也

出博物志

戚夫人

漢戚夫人善為翹袖折腰之舞歌出塞入塞望歸之曲
侍婢數百人皆為之後宮齊唱常入雲霄

出西京雜記

李龜年

唐開元中樂工李龜年彭年鶴年兄弟三人皆有才學
盛名彭年善舞鶴年龜年能歌尤妙製渭川特承顧遇
於東都大起第宅僭侈之制踰於公侯宅在東都通遠
里中堂制度甲於都下

今襄晉公移於定鼎門南別墅號綠野堂

其後龜年

流落江南每遇良辰勝賞為人歌數闋座中聞之莫不

掩泣罷酒則杜甫嘗贈詩所謂岐王宅裏尋常見崔九
堂前幾度聞正值江南好風景落花時節又逢君崔九
堂殿中監崔滌中書令湜之弟也

出明皇
雜錄

又

開元中禁中初重芍藥即今牡丹也

開元天寶花木
記云禁中呼木

芍藥為
牡丹

得四本紅紫淺紅通白者上因移植於興慶池

東沈香亭前會花方繁開上乘照夜白太真妃以步輦
從詔特選梨園弟子中尤者得樂十六部李龜年以歌

擅一時之名手捧檀板押衆樂前將歌之上曰賞名花
對妃子焉用舊樂詞為遂命龜年持金花牋宣賜李白
立進清平調辭三章白欣然承旨猶苦宿醒未解因援
筆賦之辭曰雲想衣裳花想容春風曉拂露華濃若非
羣玉山頭見會向瑤臺月下逢一枝紅艷露凝香雲雨
巫山枉斷腸借問漢宮誰得似可憐飛燕倚新粧名花
傾國兩相歡長得君王帶笑看解釋春風無限恨沉香
亭北倚欄杆龜年遽以辭進上命梨園弟子約略調撫

絲竹遂促龜年以歌太真妃持玻璃七寶盞酌西涼州
蒲桃酒笑頷歌意甚厚上因調玉笛以倚曲每曲遍將
換則遲其聲以媚之太真飲罷斂繡巾重拜上龜年常
語於五王獨憶以歌得自勝者無出於此抑亦一時之
極致耳上自是顧李翰林尤異於他學士會高力士終
以脫鞵為深耻異日太真妃重吟前詞力士戲曰此為
妃子怨李白深入骨髓何反拳拳如是太真因驚曰何
翰林學士能辱人如斯力士曰以飛鷲指妃子是賤之

甚矣太真頗深然之上嘗三欲命李白官卒為宮中所

捍而止

出松
牕錄

李袞

李袞善歌於江外名動京師崔昭入朝密載而至乃邀
賓客請第一部樂及京邑之名倡以為盛會昭言有表
弟請登末座令袞敝衣而出滿座嗤笑之少頃命酒昭
曰請表弟歌座中又笑及喉轉一聲樂人皆大驚曰是

李八郎也羅拜之

出國
史補

韓會

韓會善歌絕妙名輩號為四夔會為夔頭

出國史補

米嘉榮

歌曲之妙其來久矣元和中國樂有米嘉榮何巽近有陳不嫌不嫌子意奴一二十年來絕不聞善唱盛以拍彈行於世拍彈起於李可久懿宗朝恩澤曲子別趙十哭趙十之名劉尚書禹錫與米嘉榮詩云三朝供奉米嘉榮能變新聲作舊聲于今後輩輕前輩好染髭鬚事

後生又自貶所歸京聞何戡歌曰二十年來別帝京重
聞天樂不勝情舊人唯有何戡在更請殷勤唱渭城

出廬

氏雜
說

笛

昭華管

秦咸陽宮有玉笛長二尺三寸二十六孔吹之則見車

馬山林隱隱相次息亦不見名曰昭華之管

出西京
雜記

唐玄宗

玄宗嘗坐朝時以手指上下按其腹朝退高力士進曰
陛下向來數以手指按其腹豈非聖體小不安耶元宗
曰非也吾昨夜夢遊月宮諸仙娛余以上清之樂流亮
清越殆非人所聞也酣醉久之合奏清樂以送吾歸其
曲淒楚動人杳杳在耳吾向以玉笛尋盡得矣坐朝之
際慮或遺忘故懷玉笛時以上下尋之非不安也力士
再拜賀曰非常之事也願陛下為臣一奏之上試奏其
音寥寥然不可名也力士又奏拜且請其名上笑曰此

曲名紫雲迴載於樂章今太常刻石在焉

出開天
傳信記

漢中王瑀

漢中王瑀為太卿早起朝聞永興里人吹笛問是太常
樂人否曰然已後因閣樂而喚之問曰何得某日卧吹

笛耶

出傳
記

李暮

李舟好事嘗得村舍烟竹截為笛堅如鐵石以遺李暮
暮吹笛天下第一月夜泛江與同舟人吹寥亮逸發俄

有客於岸呼舟請載既至請笛而吹甚為精妙山石可裂暮平生未嘗見及入破呼吸盤擗應指粉碎客散不知所之舟人著記疑其蛟龍也暮嘗秋夜吹笛於瓜洲檝載甚隘初發調羣動皆息及數奏微風颯然立至有頃舟人賈客有怨歎悲泣之聲

出國
史補

又

暮開元中吹笛為第一部近代無比有故自教坊請假至越州公私更醺以觀其妙時州客舉進士者十人皆

有資業乃醕二千文同會鏡湖欲邀李生湖上吹之想其風韻尤敬人神以費多人少遂相約各召一客會中有一人以日晚方記得不遑他請其鄰居有獨孤生者年老久處田野人事不知茅屋數間嘗呼為獨孤丈至是遂以應命到會所澄波萬頃景物皆竒李生拂笛漸移舟於湖心時輕雲蒙籠微風拂浪波瀾陡起李生捧笛其聲始發之後昏曠齊開水木森然髣髴如有鬼神之來坐客皆更贊詠之以為鈞天之樂不如也獨孤生

乃無一言會者皆怒李生為輕已意甚忿之良久又靜思作一曲更加妙絕無不賞駭獨孤生又無言鄰居召至者甚慚悔白於衆曰獨孤村落幽處城郭稀至音樂之類率所不通會客同誚責之獨孤生不答但微笑而已李生曰公如是是輕薄為復是好手獨孤生乃徐曰公安知僕不會也坐客皆為李生改容謝之獨孤曰公試吹涼州至曲終獨孤生曰公亦甚能妙然聲調雜夷樂得無有龜茲之侶乎李生大駭起拜曰丈人神絕某

亦不自知本師實龜茲人也又曰第十二疊誤入水調足下知之乎李生曰某頑蒙實不覺獨孤生乃取吹之李生更有一笛拂拭以進獨孤視之曰此都不堪取執者粗通耳乃換之曰此至入破必裂得無恠惜否李生曰不敢遂吹聲發入雲四座震慄李生蹙踏不敢動至第十三疊揭示謬誤之處敬伏將拜及入破笛遂敗裂不復終曲李生再拜衆皆帖息乃散明旦李生并會客皆往候之至則唯茅舍尚存獨孤生不見矣越人知者

皆訪之竟不知其所去

史出逸

許雲封

許雲封樂工之笛者貞元初韋應物自蘭臺郎出為和州牧非所宜願頗不得志輕舟東下夜泊靈壁驛時雲天初瑩秋露凝冷舟中吟瓢將以屬詞忽聞雲封笛聲嗟歎良久韋公洞曉音律謂其笛聲酷似天寶中梨園法曲李暮所吹者遂召雲封問之乃是李暮外孫也雲封曰某任城舊土多年不歸天寶改元初生一月時東

封廻駕次至任城外祖聞某初生相見甚喜乃抱詣李
白學士乞撰令名李公方坐旗亭高聲命酒當壚賀蘭
氏年且九十餘邀李置飲於樓上外祖送酒李公握管
醉書某胸前曰樹下彼何人不語真吾好語若及日中
烟霏謝成寶外祖辭曰奉於李氏乞名今不解所書之
語李公曰此即名在其間也樹下人是木子木子李字
也不語是莫言莫言暮也好是女子女子外孫也語及
日中是言午言午是許也烟霏謝成寶是雲出封中乃

是雲封也即李暮外孫許雲封也後遂名之某纔始十年身便孤立因乘義馬西入長安外祖憫以遠來令齒諸舅學業謂某性知音律教以橫笛每一曲成必撫背賞歎值梨園法部置小部音聲凡三十餘人皆十五以下天寶十四載六月日時驪山駐蹕是貴妃誕辰上命小部音聲樂長生殿仍奏新曲未有名會南海進荔枝因以曲名荔枝香左右歡呼聲動山谷其年安祿山叛車駕還京自後俱逢離亂漂流南海近四十載今者近

訪諸親將抵龍丘韋公曰我有乳母之子其名千金嘗
於天寶中受笛李供奉藝成身死每所悲嗟舊吹之笛
即李君所賜也遂囊出舊笛雲封跪捧悲切撫而觀之
曰信是佳笛但非外祖所吹者乃為韋公曰竹生雲夢
之南鑿在柯亭之下以今年七月望前生明年七月望
前伐過期不伐則其音窒未期而伐則其音浮浮者外
澤中乾乾者受氣不全氣不全則其竹夭凡發揚一聲
出入九息古之至音者一疊十二節一節十二敲今之

名樂也至如落梅流韻感金谷之遊人折柳傳情悲玉
關之戍客誠為清響但異至音無以降神而祈福也其
已天之竹遇至音必破所以知非外祖所吹者韋公曰
欲旌汝鑿笛破無傷雲封乃捧笛吹六州遍一疊未盡

驕然中裂韋公驚歎久之遂禮雲封於曲部

出甘澤謠

呂鄉筠

洞庭賈客呂鄉筠常以貨殖販江西雜貨逐什一之利
利外有羨即施貧親戚次及貧人更無餘貯善吹笛每

遇好山水無不維舟探討吹笛而去嘗於中春月夜泊於君山側命罇酒獨飲飲一杯而吹笛數曲忽見波上有漁舟而來者漸近乃一老父鬢眉皤然去就異常鄉筠置笛起立迎上舟老父維漁舟於鄉筠舟而上各問所宜老父曰聞君笛聲嘹亮曲調非常我是以來鄉筠飲之數盃老父曰老人少業笛子可教乎鄉筠素所耽味起拜願為末學老父遂於懷袖間出笛三管其一大如合拱其次大如常人之蓄者其一絕小如細筆管鄉

筠復拜請老父一吹老父曰其大者不可發次者亦然其小者為子吹一曲不知得終否鄉筠曰願聞其不可發者老父曰其第一者在諸天對諸上帝或元君或上元夫人合上天之樂而吹之若於人間吹之人消地拆日月無光五星失次山岳崩圯不暇言其餘也第二者對諸洞府仙人蓬萊姑射昆邱王母及諸真君等合仙樂而吹之若人間吹之飛沙走石翔鳥墜地走獸腦裂五星內錯稚幼振死人民纏路不暇言餘也其小者是

老身與朋儕可樂者庶類雜而聽之吹的不安未知可
終曲否言畢抽笛吹三聲湖上風動波濤沆瀣魚鼈跳
噴鄉筠及童僕恐聳驚慄五聲六聲君山上鳥獸叫噪
月色昏昧舟楫大恐老父遂止引滿數盃乃吟曰湘中
老人讀黃老手援紫藟坐翠草春至不知湘水深日暮
忘却巴陵道又飲數盃謂鄉筠曰明年社與君期於此
遂棹漁舟而去隱隱漸沒於波間至明年秋鄉筠十旬
於君山伺之終不復見也

出博
異志

齋策

李蔚

咸通中丞相李蔚拜端揆日自大梁移鎮淮海政績日
聞未朞周榮加水土移風易俗甚洽羣情泊彭門亂常
之後藩鎮瘡痍未平公按轡恭已而治之補綴積毀整
葺壞綱功無虛日以其郡寡勝遊之地且風亭月觀既
以荒涼花圃釣臺未愜深旨一旦命於戲馬亭西連玉
鈎斜道開荆池沼構葺亭臺揮斤既畢號曰賞心栽培

花木蓄養遠方奇禽異畜畢萃其所芳春九旬居人士
女得以遊觀一旦聞浙右小校薛陽陶監押度支運米
入城公喜其姓名有同曩日朱崖李相左右者遂令試
詢之果是舊人矣公甚喜如獲古物乃命衙庭小將代
押運糧留止別館一日公召陽陶遊詢其所聞及往日
蘆管之事薛因獻朱崖李相陸暢元白所撰歌一軸公
益喜之次出蘆管於茲亭奏之
其管絕微每於一感
葉中常容三管也聲
如天際自然而來情思寬閑公大加賞之
亦贈其詩不
記終篇云虛

心織質雁銜餘鳳
吹龍吟定不如

於是錫賚甚豐出其二子皆授宰盆

倅職初公構池亭畢未有嘉名因目曰賞心諸從事以

公近諱

蓋賞字有
尚字也

公曰宣父言徵不言在言在不言徵

且非內官富妾何避其疑哉遂不改作其亭自秦畢亂

逆乃為芻豢之地嗟乎公孫弘之東閣劉屈氂後為馬

廐亦何異哉

出桂苑
叢譚

太平廣記卷二百四